

## **Pol Uqa Jaqec Je Oso Filipai Tamanec Jaqiaden Aqunec Je**

Pol uqa casac macas wana nuimei Grik hatuna calen saen euna uqa Masedonia hatuna taun ben Filipai ono me je qasali maaden. (Eu Aposel 16.8-15 feiga.) Odimei ono Kristen tamanec sanan men. Hibna Filipai tamanec eu age Pol uqa Rom ono gihacdoc jona bilia ec dumeig meen qaig cesuldocnu suldon. Aria, Pol uqa jaqec je i Filipai tamanec heteiga ec maadecnu jaqiadimeisulduaden. (Eu 1.5, 4.10-19 feiga.) Eu jaqec je i uqana gug bahic. Euqa Pol uqa je filha jaqen eu odi. Uqa adi bilina eunu madena. (Eu 1.12-26, 4.10-19 feiga.) Uqa Filipai tamanec age agena cadnu cain cucuiuwain. Euqa age gaid gagadic meigale, age gaid Krai Jisasna ceeleigale ec madena. (Eu 1.27-30 feiga.) Uqa Filipai tamanec age Krai Jisas uqana kobolnu cisdodoig age cotoga bisalu bilimeig cotoga uqana kobol me eu agena kobol me wooldoc ec cisdoigale ec madena. (Eu 2.1-11 feiga.) Uqa Filipai tamanec age wawaga osol bileigale ec madena. (Eu 4.2-5 feiga.) Uqa Timoti Epafrodaitasca ale cabi dana me bahic eunu sulaleceb Filipai ono belowasan ec madena. (Eu 2.19-30 feiga.) Uqa Juda dana leihnu mecii cuhadoiga ec madena. (Eu 3.2-11 feiga.) Dana eundec age Kristen dana dewenega cagu qocnu cesusadegina. Uqa dana leihnuha ulauladena. (Eu 3.17-4.1 feiga.) Dana eundec age

Kristen uqa Kraisna besitoc bilina eunu uqa wain sabca geh bahic jecnu eu cois egina.

Jaqec je ina Pol uqa Kristen adi bilecnu madena. Kristen dana uqa cotugul bisalu bilina (2.1-4), uqa cebac bilec haun eu ocnu tutuc guguli qee mec gadacna nuina (3.13-14), uqa ceteh os-onu jaen cain qoiaun (4.6), odocob uqa ceteh cunug odocnu ihoc (4.13). Odimej Pol uqa Kristen dana cajaca age ceelecca bilegina ec gaid madena. Kraisnu je oso eu 2.5-11 euna nijia eu Krajs uqana kobol bahic.

Aria, ege jaqec je i sanijuquna saenna ege Pol uqa Filipai tamanecnu nalunuga bahic men ec doqan.

*Je Dunuhnu Dado Mec*

1. Feele adec je (1.1-2)
2. Pol uqa Filipai tamanecnu Anut hetaga dona, odimej Filipainu inondona (1.3-11)
3. Pol uqa adi bilina eunu madena (1.12-26)
4. Cesusadecnu je (1.27-2.18)
  - A. Agena coboc eu Krajsna me je toodoiale (1.27-30)
  - B. Age Krajs Jisas ceban eu age oigale (2.1-18)
5. Pol uqana me je cabi hijagul (2.19-30)
  - A. Cabi hijag Timoti (2.19-24)
  - B. Cabi hijag Epafrodaitas (2.25-30)
6. Pol uqa dana leihnu ulauladena (3.1-4.1)
  - A. Juda dana leih age Kristen dana dewenega cagu qocnu cesusadegina eunu batut feigale (3.1-16)
  - B. Dana leih age Kristen uqa Krajsna besitoc bilina eunu uqa wain sabca geh bahic

jecnu eu cois egina eunu batut feigale (3.17-4.1)

7. Cesusadecnu jeca, Hetaga ec jeca, Cit qoc jeca (4.2-23)

A. Kristen agena cobocnu je filfilnu madena (4.2-9)

B. Pol uqa Filipai tamanec haun heteiga ec madena (4.10-20)

C. Feele adecca, eeladec jeca (4.21-23)

<sup>1</sup> Ele Pol Timotica, ele Krai Jisasna cabi dana. Ele Anutna qagoc dana cajaca age Krai Jisasna gabanadecca, tamanec cofadecca cesuladecca ono Filipai bilegina eu jaqiadowona.

<sup>2</sup> Ege Memige Anutca egena Tibud Jisas Kraisca alena eelgec uum igecca malol bilecca adesiale.

*Pol uqa Anut hetaga don*

<sup>3</sup> Ija saen cunug ija agenu cisdugina eu agenu ijana Anut hetaga dugina.

<sup>4</sup> Odocob ija saen cunug age cunugnu inondugina ija ceelecca inondugina.

<sup>5</sup> Ija eetanu agenu ceeligina? Age me je wawaga meleen deel hahawannadec huhu qila ina me je qasali maadec cabinu cesultein.

<sup>6</sup> Odocob Anut uqa cabi me i age dunuh sanan men eu gahidodob lili Jisas Krai ceseli hoc deelna qee migiannu ija du cuhadugina.

<sup>7</sup> Age gaid ija wawi cisdocna bilegina! Eunu ija agenu odi tebandugina eu tutuc. Age cunug cabi i Anut ija ebenina miten eu osobenca om. Eu qila ija gihadoc jona biligina, odocob wele me je sildiadecemin gagadic tawen saen euna ha cabi i ija osobenca om.

<sup>8</sup> Ge, ija Anut amegna mele je maadigina, ija wawi agenu geh hoolena eu Krajs Jisas uqadodoc waugnadec hona.

<sup>9</sup> Odocob ija agenu inondugina, agena nalug mec eu gaid ben migiannu, odocob agena doc silecca cisdoc fecca euha ben migiannu eu odi inondugina.

<sup>10</sup> Eunu age ceteu eu me bahic eu age nesili cedoqagan. Odocob age Krajs ceseli hoc deelna age gegehina qee, cahuldocca qee biluqagan.

<sup>11</sup> Odocob agena coboc eu ceteu me bahic gehca Jisas Krajsnadec hona eu agenu am bigian. Odocob agena me coboc eu Anut binan uteceb binan suleqan.

### *Bilecnu eu Krajs*

<sup>12</sup> O wawige meleec cotiel, ija ceteteu ijaca calen eu me je cesuldocob gehca nuen eunu age doqagannu gale tena.

<sup>13</sup> Eu odocobnu han cadec dana cunug Sisana jo cofdoginaca dana cunug age ene bileginaca age ija Krajsnu gihacdoc jona biligina eunu wele doin.

<sup>14</sup> Odocob ija gihacdoc jona biligina eunu wawige meleec cotigeil mati age gagadic odoc umeig agena Tibudnu wawaga meleec eu gagadic tawena. Odocob age cucuiec culimeig Anutna je saluqi u maadecnu gehca gagadic mein.

<sup>15</sup> Eu mele, leih age ija cabi omnu wawaga me qee men, odocob age ija wooltecnu gale adena eunu age Krajsnu me je qasali maadegina. Euqa leih age wawaga meca eunu Krajsnu me je qasali maadegina.

16 Dana i wawaga meca age Anut uqa me je sildiadecnu cabi ija ebenina mitennu dogina, age ijanu naluni megina eunu age odi odogina.

17 Euqa dana leih age ija wooltecnu Kraisnu me je qasali maadegina eu agedodoc ijanaga ohis sulecnu cabi ogina. Age wawaga tutuc qee ninijen eunu odi odogina. Age ijana gihacdoc jona bilec eu culumen leih haun tubdutuqagan bili odogina.

18 Eu odi fena! Ija eunu galeigina. Age jic leih cunugnana Kraisnu himec qasali maadegina. Age conogana himecfo, qee wawaganadecfo Kraisnu qasali maadegina eunu ija wawi ceelena.

19 Ija eetanu wawi ceelena? Age Anut ijanu inondoginaca, odocob Jisas Kraisna Kis cesultenaca euna age besituqagannu ija dugina.

20 Ija odoc tutuc qee odecemin qee majani teiaunnu gale ben tena. Euqa saen cunugnaca qila bahicca ija wawi duueceb kobol tutuc odigen eu odi ija gaid odiginawe eunu gale tena. Eunu ija cebac bilifig ija cal mifig ija dewenina Krai binan caligian.

21 Cebac bilecna gug eu eeta? Ijanu gug eu ija Kraisca osoben cobowona. Ija cal mifig ija uqaca bilocohul catanigian.

22 Euqa ija dewenina gaid cebac bilifig ijana cabi eu aig qugian. Euqa ija cel jic toodugen? ec qee dugina.

23 Ija jic lecis gemo hewitina. Ija cebac bilec i culimig Kraisca bilecnu gale tena, eu me bahic.

24 Euqa ija mahana gaid bilifig eu age cesuladecnu eu me bahic wooldoc.

<sup>25</sup> Ija inu du cuhadugina. Eunu ija biligen eu dugina. Ija age cunug cesuladigennu gami bileqan. Ija age wawaga meleec gagadic tawigian-nuca, wawaga ceeligiannuca cesuladigen.

<sup>26</sup> Odocob ija ageca haun li caligen, eunu age ijanu culai Kraiss Jisas binan suluqagan.

*Anut uqa Filipai me madimeis culadeceb dain adec gahidoin*

<sup>27</sup> Ceteh oso ben nijia. Agena coboc eu Kraissna me je toodoiale. Age odi odocobilfi eu ceteh me bahic. Eunu ija li age feciadigenfo, qee ija qee ligaunfo ija agenu je dih suldocobil dah migale, age wawaga osolna taweginaca, age cisdoc osolna wawaga meleec uqana me jenu osoben eb li cabi gagadic oginaca ec dah migale.

<sup>28</sup> Ageha agena cadnu cain cucuiuwain, age gaid gagadic meigale. Odocob age odi odocobilfi agena cad age fadaloqagan ec doqagan. Odimeig agena cahahaadec eu Anutnadec eunu age Anut cahahaadigian echa doqagan.

<sup>29</sup> Eetanu? Anut uqa age Kraiss cewel utoc cabi aden. Odocob cewel utoc cabi eu odi. Age uqanu wawaga himec qee meleena qa age uqanu wawaga meleceeb age uqa ijannu dain adecha gahidogina.

<sup>30</sup> Qila age ijaca osoben han cadoqona. Han cadec eu wele ija han cacadigin age fein, qila ija han cadigina ec dah megina.

## 2

*Ege wawige osol bileceb wawige meleec cotigeilnu me odoqale*

<sup>1</sup> Age Kraisca gabanadec bilegina eu odadeceb gagadic megina, odocob uqana nalunuga mec eu wahohogadena. Age Kisca wawaga osol bilegina, odocob age wawaga meleec cotogailnu wawaga qocob cesuladegina.

<sup>2</sup> Eunu ija niniaadi maadigina, age cisdoc osol bileigale, age nalug mec osol meigale, age wawaga cisdocca osol bileigale. Age odi odocobilfi ija ben bahic ceeligen.

<sup>3</sup> Age ija didih ii ceteh oso cain odowain, age ija didih ii cain deboowain. Agena kobol me eu cotoga uqana kobol me wooldoc ec cain cis-dowain. Euqa age cotoga bisalu bilimeig cotoga uqana kobol me eu agena kobol me wooldoc ec cisdoqagan.

<sup>4</sup> Odocob age agena ceteteh dih cain cofdowain, age cotogail agena ceteteh ha cofdoigale, odocob ageha me biluqagan.

<sup>5</sup> Kraiss Jisas ceban nijia, uqa ceban eu ageha oigale.

<sup>6</sup> Uqa Anut ihoc bilen, euqa uqa Anutwe bilecnu hewihewidocnu waug qee bilel.

<sup>7</sup> Uqa Anut bilec culimei uqadodoc begabeg meh ibuldon.

Uqa dana ihicon qu cali hon.

<sup>8</sup> Uqa dana coboginawe odi cocobon fein.

Uqa lal qumei uqadodoc binan qee mumudi Memeg co toodu oodi cal men.

Mele, na babalecna cal men.

<sup>9</sup> Eunu Anut uqa ehudi ehi ti ohis bahic muden.

Uqa ijan oso uten, eu ijanaga cunug wooldoc tawena.

<sup>10</sup> Eunu Jisas ijan eu binanca bahic,

odimeig cunug age saona gunnaca, mahanaca, maha dunuh nocnaca bilegina eu age gob cehimeig ijan eu binan suluqagan.

<sup>11</sup> Odimeig age cunug beilamaga osol mi Jisasnu madi madoqagan, Jisas Kraiss uqa egena Tibud, oqagan.

Age Memige Anut binan wasigiannu odi odoqagan.

*Ege dana cajaca gemona fulacdocwe bileqan*

<sup>12-13</sup> Eunu, ijana danah bahic, ija ageca ono bilom saenna age ija conigaid toodoloigwe eu odi qilaha ija ageca qee biluquna saenna ija conigaid toodu bahic toodoigale. Anut uqa wele cahahaaden. Anut uqa age dunuh gaid cabi ona, age uqana cisdoc todocnu gale adena eunu gaid cabi ona, odocob uqana cisdoc toodu odocnu ihoc eunu ha cabi ona. Eunu age cucuii qeleli agena me bilecnu cabi eu gagadic oiga.

<sup>14</sup> Ceteteh cunug age odogina eu gonagona mecca jena fee dadanec eu culimeig odoigale.

<sup>15</sup> Eunu cahuldocca qee, cataniecca biluqagan, odocob age Anutna mel sim eu gegehinc qee eundecwe age silail dana cajaca kobol me qee odogina eu age gemona biluqagan. Age gemo fulacdocwe dana cajaca mahana bilegina eu cujawadeceb

<sup>16</sup> age cebac bilecnu je eu u adoqagan. Age odi odocobilfi ija agenu cabi gagadic om eu gauc qee cusdugaunnu ija Kraiss ceseli hoc deelna culunuga ugen.

<sup>17</sup> Agena wawaga meleec eu ihanecwe age Anut utegina. Euqa age ija golani wainwe ihanec euna



basecdoqagannufi ija galeigina, ija ageca osoben ceeloqona.

<sup>18</sup> Eu odi himec ageha galeeiga, age ijaca osoben ceeleqan.

*Pol uqa Timoti Epafrodaitasca sulaleceb Filipai belowasan ec maden*

<sup>19</sup> Jisas Tibud uqa gale dufei nag odi ija Timoti suldocomin ageca ligian. Odocob uqa ceseli hu agenu je mateceb ija wawi ceeligian.

<sup>20</sup> Uqa himec ijaca osoben tebandowona eu uqa age adi bilegina ec cisdona.

<sup>21</sup> Dana leih cunug age agena ceteteh dih cofdogina. Odocob age Jisas Kraisna cabinu qee cofdogina.

<sup>22</sup> Euqa age Timoti uqa dana me ec dogina. Uqa ija me je cabina melah memeg cesuldonawe cesulten.

<sup>23</sup> Ceteh cunug ijaca adi calena eu casac dumig ija uqa ageca mahucwe suldocomin ageca ligian.

<sup>24</sup> Odocob Tibud uqa gale dufei ija jic qahiteceb nag odi ijaha ageca ligen.

<sup>25</sup> Ija Epafrodaitas suldocomin ageca ligiannu cisdom. Uqa ija wawige meleec cotica, uqa me jena cabi hijenica, uqa ijaca osoben han dana. Wele age Filipai uqa suldocobil ijaca hon, odocob uqa age ijanagana ija cesulten.

<sup>26</sup> Uqa age feciadecnu waug hoolena. Odocob age uqa hagca ec dah meinnu waug culumen dona.

<sup>27</sup> Mele, uqa wele hag qon, odocob uqa cal migiannu odon. Euqa Anut uqanu waug qon. Odocob uqa uqanu dih waug qee qol, uqa ijanu

ha waug qon. Uqa ija culumen ben haun cain jahulteiaunnu waug qon.

<sup>28</sup> Eunu ija uqa suldocomin ageca leceb age uqa haun fecidumeig ceeloqagannu gale ben tena. Odocob ijana jaen qitec qee migian.

<sup>29-30</sup> Eunu age Tibud ijanna ceeli bahic ehudeiga. Odocob uqa Kraisna cabinu wele cal miigiannu odon. Uqa cebac biligiannu qee cisdol. Age ija cesultecnu cabi ebenna mein eu u hedocnu cisdumei eu odi odon. Eunu age dana eundec binanaga suleigale.

### 3

*Dana uqa Kraisnu waug meleena eu dana ititom*

<sup>1</sup> O wawige meleec cotiel, ija je i edi ijana jaqiadec qee mudigen. Age Tibudca gabanadec eunu ceeleigale. Ija wele jaqiadem eu haun jaqiadecnu wawi culumenca qee. Ija odi odocominfi age gagadic tawoqagan.

<sup>2</sup> Age dana qisol megina eunu mecii cuhadoiga. Dana eundec age qa cinigwe, age dana dewenega cagu qumeig me qee mudecnu cesusadegina.\*

<sup>3</sup> Ege dih dewenige cagocnu kobol mele bahic eu egeca. Ege Anutna Kisna Anutnu cuha fifi Jisas Krais binan suluquna. Dewenige cagu qoc kobol eu ege cesulgigian ec wawige qee meleel.

---

\* **3:2:** Dana leih age dana cajaca odi maaden, “Age Kristen calegina saenna age Juda agena kobol toodu odimeig age dewenega cagu qoiga,” aden eu odi fena. Pol uqa dana eu qa en, odimeig uqa dana cajaca age dana eundecnu ulauladen.

<sup>4</sup> Euqa dewenega cagu qoc kobol eu dana cesuladecnu ihocfi ijaha dewenige cagu qoc kobol eu ija cesultecnu ihoc bahic. Dana eundec leih age dewenega cagu qoc kobol eu ihoc cesuladigiannu wawaga meleena euqa dewenige cagu qoc kobol eu wooladi ben bahic cesultigiannu ihoc.

<sup>5</sup> Deel 8-peladocna age ija deweni cagu qoin. Ija Isrel agena dana cajacanadec sihul. Ija Benjamin sihulnadec. Ija Hibru dana bahic, Hibru golanganadec. Loo jenu ija Farisi dana loo je todoc dana bahic.

<sup>6</sup> Cabi megameg mecnu eu ija Kraisna tamanec tootoadolog. Loo je bisalu ititom cobocnu eu ija cahuldocca qee.

<sup>7</sup> Euqa ija wele cel ceteh me oso om ec cisdugina eu Kraisnu ceteh gauc ec cisdom.

<sup>8-9</sup> Eu mele, ija Krais Jisas ijana Tibud ec dugina eu ceteh cunug wooladec bahic. Eunu ija ceteh cunug om eu tageladec igina. Ija Krais dih ocnuca ija uqaca gabanlec bilewannuca odigina. Eunu ija Kraisnu ceteh cunug tageldom, eu tetec gaucwe ec cisdugina. Ija qila ijanel ititom qee, ititom eu loo je toodu odigina euna om. Ijana ititom qila hewigina eu Kraisnu wawi meleena euna om. Ititom eu Anutnadec, dana cajaca age Kraisnu wawaga meleeceb Anut uqa agenu dana cajaca ititom ec madena.

<sup>10</sup> Ija Kraisnuca, uqana gagadic odocnuca du cuhadugennu odigina. Gagadic odoc eu uqana cal mecnadec tulidocob ceseli cajan. Odocob uqana waug sogoec eu ija uqaca osoben gahid-owannu odigina. Odocob ija uqana cal mecna uqa cicilon ugennu odigina.

11 Adi odocomin Anut uqa ija cal mecnadec tuliteceb ceseli cajimig cebac bilec haun ugen eunu cisdugina.

*Age guguli nui qee mec gadacna calecnu tem-doiga*

12 Euqa ija cal mecnadec tuliteceb cebac bilec haun eu wele om ec qee madigina. Odocab ija qila silailca qee biligina ec qee madigina. Euqa ija cebac bilec haun eu ugennu Kraisa Jisas ija uqadodocnu wele oiten. Eunu ija cebac bilec haun eu ocnu licdudu gaid nuigina.

13 O wawige meleec cotiel, ija eu wele om ec qee cisdugina. Euqa ceteh osol ija odigina, eu ceteh ija hibilemi nijia eu dahini celeceb ceteh olanina nijia eu ocnu gagadic licdudu nuigina.

14 Eunu ija cebac bilec haun eu ocnu tutuc guguli qee mec gadacna nuigina. Cebac bilec haun eu ameg me bahic Anut uqa ija Kraisa Jisasca gabanlec bilewanna utateceb ija jobon ohis euna ti cebac biligen.

15 Ege cunug dana cisdoc sileccawe cisdoqona eundec ege ija cisduginawe odi cisdoqale. Euqa age leih agena cisdoc eu filfi Anut uqa agena cisdoc tutuc mudigian.

16 Euqa ege ceteh wele dom eu gaid hewi toodu odoqale.

17 O wawige meleec cotiel, age cunug ija ciciloni oigale. Dana eu age ege odoqonawe odi odogina eundec feciadi cuhadumeig tooadeiga.

18 Ija je i saen mati wele maadem, odocab qila ija amulini nenen haun maadigina, dana

mati agena bilec eu odadeceb age Kraisna na babalecna cal mecnu cad mudein.

<sup>19</sup> Age dewenega gale doc eu agena tibud. Age majanagaca qa agedodoc binanaga sulegina. Odocab age mahanadec cetehnu dih cisdogina. Eunu age hibna ja benna fadaloqagan.

<sup>20</sup> Euqa ege je hahunige uqana jobon eu saona nijia. Onodoc ege Cahahagec Jisas Krais Tibud ege cahahagigiannu toni nigian imeb uqa susumudi biluquna.

<sup>21</sup> Uqa ege dewenige calua qila egena jo taweceb coboqona eu ibuldocob Krais uqadodoc deweg kobolkobolca nijina odiwe caligian. Eu odocnu gagadic odoc eu uqa ceteh cunug odadeceb uqa bisalu bilegina euna ihoc odigian.

## 4

*Ege wawige osol meceb ceelimeb cisdoc me oqale*

<sup>1</sup> Eunu, ija wawige meleec cotiel, ija agenu nalunuga migina, ija feciadecnu hooligina! Ija agenu ceeligina, ija culunuga ugina. Ija cotiel, age Tibudca gabanadec bilegina euna odi gagadic taweigale.

<sup>2</sup> O Juodia Sintikica, ale Tibudca gabanadi wawala osol mesiale ec ninialigina.

<sup>3</sup> O Sisigus,\* hinaha, ijana cabi hijeni bahic, hina caja lecis i cesulalagale ec ninihigina. Ge, ale me je fulusdugian bili ijaca cabi gagadic om. Aleca, Klementca, ija cabi hijeniel leihca age

---

\* **4:3:** Ijan i uqana gug eu “cabi hijag bahic.”

ijanaga Anutna cebac bilec bukna nijia eu age osoben cabi eu gagadic oin.

<sup>4</sup> Age Tibudca gabanadi bibili wawaga ceeleiale. Ija haun maadigina, ceeleigale.

<sup>5</sup> Age dana cunug wawaga jocosaigca odadeigale. Eunu age agena kobol eu me bahic ec doqagan. Tibud ceseli hoia dodolgena.

<sup>6</sup> Age ceteh osonu jaen cain aqeiaun. Age Anut agena culumen wawaga hoolecca cunugnu gaid ninidudu inondoigale. Odimeig age Anut ceteh cunugnu cesuladecnu inondodoig hetaga doc madeigale.

<sup>7</sup> Odi odocobil Anutna malol bilec eu, ege dana cajaca uqana gug docnu ihoc qee, age wawaga cisdocca Jisasca gabanadi biligiannu cofdugian, odocob wawaga cisdocca jaen qee aqeiaun.

<sup>8</sup> Ija wawige meleec cotiel, ija cit qoc je oso maadigen. Age ceteteh eu mele, ceteteh eu binanca bahic, ceteteh eu tutuc, ceteteh eu cataniec, ceteteh eu fecnu galeca, ceteteh eu meca bahic, ceteteh eu binan sulecnu ihoc, ceteteh eundecnu gaid cisdoigale.

<sup>9</sup> Ceteh ija iwaladecemin oinca, ceteh ija odom ec doinca, ceteh ija odom ec feinca eu cunug odoigale. Odi odocobil Anut uqa malol bilecca eu ageca biligian.

*Filipai age bagol utec oso Polca suldocobil hon eunu Pol ceelen*

<sup>10</sup> Age saen cecelac gieceb qila agena cisdoc tulidocobil ijanu haun cisdoin. Eunu ija Tibudca gabanli bibili ceelowona. Age mele wele cistein euqa age cesultecnu jicca qee.

11 Ija cetehnu gohic mitina imig qee madelem. Ija adi biligina ec figina eu cunug ija wawi cois ena. Kobol eu ija wele dom.

12 Ija sawen bilecnu ihoc igina, odocob ija ceteteh mati hewecnu ihoc igina. Ija doc oso dugina eu odi. Ija sab gehcafo, ija sabca qeefo, ija ceteteh maticafu, ija cetetehca qeefo, eu saen cunugnana anaana biligina ija cunugnu cois igina.

13 Ija Kraisca gabanli biluwuna eunu gagadic odoc Kraisa itina euna ceteh cunug odocnu ihoc.

14 Euqa age ijana culumennu cesultecebil osoben gahidom eu kobol me bahic odoim.

15 Saen hahawan ija me je mamadig ija Masedonia hatu culdem euna age Filipai agedodoc tamanec osooso ijana cabi cesultecnu meen qaig qee suldutelein ec dogina. Age himec ijana cabi cesultecnu meen qaig sultein.

16 Eu mele, ija Tesalonaika taun ono biled saen eunaha age ija saen osolna cesultec suldutein. Odocob hibna age ija haun cesultec suldutein.

17 Ija bagol itec ocnu qee waligina. Euqa ija age agena kobol me eu gehca caligiannu gale tena, odocob Anut uqa ameg me bahic adigian.

18 Ceteteh cunug ihocca geh bahic eu ija agenadec wele cedem. Ija wele am bem. Age bagol itec Epafrodaitas ebenna ija suldutein eu ija wele om. Bagol itec eu, eu ihanec dedeman me wasenawe age Anut utegina. Anut uqa ihanec i cois imei ona. Anut uqa ihanec i cinigwe ona eunu uqa waug ceelena.

19 Odocob ijana Anut ege dana cajaca Kraisa Jiasca gabangec biluquna eu ceteteh

kobolkobolca geh bahic igecnu wele men. Uqa eunadec wawaga hoolec cunug adeceb ihoc ligian.

<sup>20</sup> Ege Memige Anut binan sulocomun cataneiale! Mele.

<sup>21</sup> Age Krajs Jisasna dana cajaca qagoc cunug eu feele adeigale. Wawige meleec cotiel age ijaca biluquna eu age feele adec sulduadegina.

<sup>22</sup> Anutna dana cajaca qagoc cunug age feele adec sulduadegina. Leih age Sisana jona cabi ogina eu ageha feele adec sulduadegina.

<sup>23</sup> Jisas Krajs Tibud uqana eelgec uum igec eu age dolonogaca biliale.



**BAL CEHEC JE HAUN**  
**Genesis and the New Testament in the Amele**  
**language of Papua New Guinea**  
**Buk Stat na Nupela Testamen long tokples Amele long**  
**Niugini**

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

---

PDF generated using Haiola and XeLaTeX on 28 Dec 2024 from source files dated 31 Aug 2023

efcfe8ba-c483-58bb-922c-05455e0b9491